

四庫全書

集部

欽定四庫全書

集部

矩山存稿

卷四
附錄

詳校官起居注主事

臣顧宗泰

主事臣呂雲棟覆勘

總校官知縣臣楊懋珩

校對官中書臣方大川

謄錄監生臣余芳

欽定四庫全書

矩山存稿卷四

宋 徐經孫 撰

詩

四言

賜宜春易太極

易有太極在天地先兩儀四象是謂後天春臺得之云
自希夷吉凶禍福予以前知八十二宮頗與俗殊數往
知來亶其然乎

元旦訓孫

咨爾潭生今歲十六棄汝幼志企慕老宿收汝放心歸就
檢東業必精思書必勤讀敬事父母出入必告欽奉師
模傳習必熟友愛同氣如手如足珍重自身如珪如玉
非禮勿視祇汙青目非禮勿聽祇亂心曲非禮勿言言
必招辱非禮勿動動必非福翁作箴言爾其佩服念哉
敬哉中有天祿

五言

覺溪八景

雷奔石壁間，瀑瀉洞門側。
蜿蜒乘洪濤，變化莫可測。

右龍門春浪

西風吹石岐，鱗甲起深轍。
借問去來人，誰是騎鯨客。

右鼇頭秋風

初生半崖陰，漸失雙峰翠。
倏忽滿太虛，蒼生望霖雨。

右羅阜朝雲

溪月濯銀盤，溪橋卧脩軌。
沙淨碧波寒，分明見蟾闕。

右潘溪夜月

山圍古寺陰曙隔鯨音發悠揚三四聲喚上東林月

右隆福晚鐘

飄蕭鷗鷺羣淅瀝菰蒲晚雲斷山月明新泉落前澗

右驪塘暮雨

林館碧溪陰絃歌雜燈影夜分猶吾伊學海在人境

右水北書聲

詩家在東皋雞林價爭售作者復幾人風月三千首

右東源詩社

題施山觀音閣

閣道連雲棧，簷牙覆竹陰。
南來天馬渡，北落水龍吟。
林鳥疑譚偈，田花欲佈金。
凭欄觀下界，洞見遠公心。

長子思訖赴江西庾幕

三年永豐簿，兩載半臨川。
納滿無多日，奇逢有二天。
臨民須近厚，減價要重蠲。
莫道違離遠，常如在膝前。

思訖生朝分忠勤酒侑之以詩

帝正纔五五吾子始生時潘縣花將錦陶門柳欲絲與
民同樂意在我即琴棋酒自忠勤出公餘薦一卮

病中有感

習懶多成病旬餘久覆盃帳中聞燕語瓶裏看花開醫
已肱三折愁來腸九迴何時得疎散屐齒印蒼苔

幼子思誼舉次孫命名陽生

吾年七十四始見兩孫枝陽德初回候蟾光欲滿時傳
家惟簡冊願汝似蘭芝何日解言語能吟公此詩

送思訖之官鼇峰

我如汝年時訪問便江戎選穽如海深望洋吁可怖汝
今亦宜教去作鼇峰主有民環百里待汝字而撫何以
奉寬條何以撫黎庶惟公則生明平心閱牒訴惟廉則
寡過莫受脂膏汙惟勤則集事慎勿習逸豫惟儉可無
求只學我清苦持此四字符便是作縣譜去家三百里
兩地無多路安問來與往時走一健步居官而民宜睽
隔非所慮三年課最歸可以見君父

咸淳壬申六月不暑

常年六月六暑氣何其酷犬有吐舌煩猫得負背燠今日胡不然蕭然涼氣足陽烏潛其輝小雨時霰霖重袂猶未溫浴了肌起粟老病固宜然壯者亦不浴短至未及間秋陰如許毒本朝王火德德與堯運續文命明四海年世不待卜吾君乾六龍剛健粹如玉吾相泰九二夬夬出覓陸君臣德既同詎有此陰伏吾聞氛氣惡殺氣盛西北裏城既失守生靈爛魚肉匹夫尚懷憂知此

妄屠戮臣固告上天忍淚不敢哭願言掃陰邪日月舜
耳目中國盛陽明從今調玉燭

六言

題伴雲樵唱

佛法生憎綺語道人安用樵歌有時言外悟意不覺山
中爛柯

自贊夏端甫所繪真

老我不堪位置歸來久混漁樵忽然珠玉在側見之令

人意消

七言

春班遇雪

拜賜通班近玉墀
小臣今日覩朝儀
雪花飛在藍袍上
潔白其身正此時

和端茶訓子 三首

東坡月窟天香遠
山谷雲濤味玉溫
相對兩翁元祐老
說茶風味到今存

寫詩只到黃山谷又失西川蘇子賢更把名章細商畧
續絃那可惜膠煎

三日君詩當刮目看來字字到雲和從今喜入聖人手
孔杏壇中取瑟歌

南英會芳亭

衆芳會處得春多草色隨人氣亦和聞道吾宗好兄弟
棣花香裡細吟哦

過嚴子陵釣灘

仰止高風不可攀且圖生出鬼門關稽首臺前無復過
歸家斬却釣魚竿

和臨湘奉議孫敷山歸田十詠并序

余引年得謝因思同里有前輩孫公奉議以
年未五十致其仕賦歸田十詠音調幽閒
心切慕之勉強追和然豈特其詩不可及
其見機知止之早尤不可及也姑錄以示
兒輩知里中有此亦可以洗林下何曾見

一人之誚云

仰止高風早賦歸晚生自恨不同時公如嶺上孤松秀
我亦松間百尺絲

尚記千官拱帝堯日隨環珮早趨朝螭坳羶下從容際
咫尺天顏未覺遙

喬山卻似會稽陰千里孤臣淚滿襟沐浴恩波無地報
始知滄海未為深

咸淳天子憐臣老紫殿清華極遽情賦祿玉隆真畫錦

有時聽得步虛聲

九重憂責詎能分
不雨羞為出岫雲
累疏丐歸今得請
保全晚節荷明君

北窓自有來薰處
長夏何妨一枕高
竹薄未能遮照徧
西風我欲障葡萄

活水一溪如玉瑩
好山四面似螺堆
個中自足歸吾老
莫待北山文勒回

家有園池幸未荒
客來有酒或傳觴
秋宵玩月冬觀雪

春日尋芳夏納涼

人心易溺誰能拯世道如瀾孰與回賴有聖賢遺訓在
好懷每為古書開

早眠晏起自安恬頭上從教白髮添和了十詩賒七字
太平時節效陶潛

題安原寺

杜老曾留脩覺句韓公亦有岳山題愧無健筆希前括
謾把飛紅當踏泥

病起 二首

去年習懶因成癖瘦骨支離怯病魔今日團圓環四世
玉蒲細切泛金荷

上高殊邑尚吾鄉千里相忘是建康王事賢勞宜不廢
師生義重詎能忘

出朝賦歸來好 十一首

歸來好籬下菊花應未老晚香猶可薦清樽淵明醉後
和衣倒

歸來好兩歲引年章屢草聖恩寬辱不容閑今得生還
真大造

歸來好顏巷安居樂吾道此行不敢怨風聞只恨舒君
言不早

歸來好一入山林迹如掃杜門謝客免愆尤几淨牕明
讀莊老

歸來好菊後梅前宜問道退朝羽翼此心生從此五更
無起早

歸來好從此五更無起早雖然畎畝辦香心天子萬年
多壽考

歸來好三徑須宜有花草於中竹柏可耐寒更種長松
成四老

歸來好飲食起居隨晏早閒身樂得未龍鍾東阡西陌
尋芳草

歸來好茅簷曝背無煩惱欣時讀易困時眠箇中輸與
痴頑老

歸來好龍門有山名七寶宿生泉石頗有緣往來儘可
休吾老

歸來好萬喜千歡無煩惱日課吾孫讀古書此是吾家
傳世寶

北坑拜掃有感

手植松楸四十年扶蘇枝葉欲參天四兒惟有哀翁在
時領孫曹拜墓前

題金魚郎

金魚有術妙談天走遍江湖竭跋躔玉帶貴人如一遇
定知換酒不論錢

贈射虎人

馮婦下車須有勇將軍射石亦通神南山白額新除害
好賞今時射虎人

去國

崎嶇山路記曾遊誰識為臣去國愁柏府官中羞豸角
桐江臺上愧羊裘重違君命留行者既竭吾才歸去休

霜露感人千里思松楸未掃已三秋

北壑瀛洲亭

山中有水水中洲欲訪蓬瀛此處求孤嶼挿天如措筴
危亭臨渚似飛樓並崖香草仙餘藥隔岸人家風引舟
箇裡藏脩功行滿弘文學館快情遊

山塘精舍

歸來魚鳥亦相親草創山塘謾以名旋築堤防留水住
盡除菑翳聽松聲族姻語語人情洽雲勢陰陰天氣清

好續溪山真率會從今八景又重成

恭和御製詩

多士新彈貢禹冠對天忠切動龍顏
臚傳聲徹頒袍笏燕喜筵開肅佩環
樂奏簫韶成廣內詩成奎畫照人間
微臣捧詔慚疎拙也抱傳宣拜賜還

弭節堂

殷勤主禮重賓榮弭節新堂慶落成
語熟不妨移座密更長那復記盃行
轄投相共傳佳話榻下於今見故情

太史定知牛斗分客星也傍使星明

慶仲明弟領鄉薦

記得溪山橫膝語何時解取世科收薦名恰在二八數
屈指重來四十秋歲月滔滔催後進功名冉冉繼前脩
福州得捷知安福更願君恩賜狀頭

福州即景

一別居諸歲月增遙聞此景畫難能潮田種稻重收穀
道路逢人半是僧城裡三山千簇寺夜間七塔百枝燈

常年六月東山裏地湧寒泉漱齒冰

福州鹿鳴宴

鹿鳴今日宴嘉賓六萬塲中一百人
鰲嶺峰前連巨釣龍臺高處耀脩鱗
假途文字皆由命實地功名好致身
得意春風馬蹄速杏園交慶綠袍新

長孫敏學授承務郎

辛勤塲屋一書生六卷時文謾策名
身事兩朝奚所補恩覃五世亦何榮
前人慶澤宜豐報爾輩官曹詎可輕

移孝為忠斯不負更須勤學紹家聲

黃元肇江山風月閣

江山到處堪圖畫風月無邊自古今
但要清明如外境便分動靜即吾心
坡仙取用原無盡康節登臨豈浪吟
天理流行須體識莫將嘲弄費光陰

培芳亭草創胥會

培芳草創強鋪筵畫出清明三月天
長少團樂還五世笑談邂逅集羣賢
或歌或弈孟無筭非竹非絲樂自然

過則相規善相勉須令和氣藹無邊

送仲時弟

江關千里隔山川有弟能來慰眼前
方喜雁行隨處樂可堪蟾影別時圓
暑行勿亟宜強飯湍激多驚莫問船
歸到家山相勞苦團欒恰是菊花天

題西坡岩心亭

脩然古木湛然池樂意相關自造微
莊子非魚真實問海翁狎鳥本忘機
樽中有酒逢人酌琴上無絃信手揮

禿盡剡藤吟不就妙哉川泳與雲飛

賀汝立拜恩封

君恩歲序兩俱新
鸞詔叨榮鶴髮親
天上龍光疏雨露
堂前燕笑壽松椿
孫枝子舍皆騰踏
蘭省薜池交問津
此去椒盤重獻頌
斑衣中有綠衣人

和李後林分惠瑤花降字韻

詩句尋芳自抑揚
一觀佳什覺心降
山中玉蕊雖無數
天上瓊花孰有雙
愧我未能瞻後土
荷君分惠到南牕

從今可小中興瑞大地移根到此邦

乙丑三月十二夜夢得家有園池樂壽康之

句覺而足成效邵康節作首尾吟八首

家有園池樂壽康四時隨分得徜徉魚遊春水吾同趣
蓮拆秋房客共嘗風裡松聲傳古調雪中梅蕊驗初陽
官閒身老猶幫俸家有園池樂壽康

家有園池樂壽康閒中日月覺偏長睡餘攜幼遊花園
飯後呼童給鶴糧堆案縱橫書數冊隨盤歡喜酒三觴

客來問我渾無事家有園池樂壽康

家有園池樂壽康君恩廣大壽無疆玉龍自是神仙骨
紫殿容依日月光不織不蠶時賜帛無功無過歲支糧
老臣得此知慚愧家有園池樂壽康

家有園池樂壽康撫存松菊未為荒斛租不及胡椒數
樊圃何如步障長靜裡謾看猿弄臂閒中時聽鶴鳴吭
山林陰密宜藏拙家有園池樂壽康

家有園池樂壽康人生何用苦乾忙三冬慣曝茅簷日

九夏貪眠竹簟涼大寫文書遮老眼熟煨芋栗飽枯腸
無榮無辱渾無事家有園池樂壽康

家有園池樂壽康北牕何敢傲羲皇池開滿引靈泉脈
戶敞西迎太乙光初節易渝誰保晚好人難做必觀常
老來自適閒中趣家有園池樂壽康

家有園池樂壽康晴簷曝日小春陽爐存楮火難過
觥酌芹蔬味更長更覺寒威潛出戶便令和氣復連床
團圓家慶堪圖寫家有園池樂壽康

家有園池樂壽康
浮雲富貴利名場
欄栽藥相揚樓美
壇植花王姚魏良
忘機久結盟鷗社
得意閒觀狎鷺塘
提壺挈榼堪遊賞
家有園池樂壽康

丙寅九月送龍門課試士友

涼風九月菊花天
路近龍門自坦然
勝友如雲儒雅集
雄文麗藻燦連篇
平時學問勤攻玉
聖世功名好著鞭
黃屋臨軒新策士
姓名一一聽臚傳

和胡適齋韻

得得高軒到澗泉真成空谷喜跼然三詩惠我驚人句
八袞如公現世仙一見長身知潤德頗疑盛際有遺賢
君王已獲非熊兆釣隱如今起渭川

詞

水調歌頭

致仕得請

客問矩山老何事得優游追數平生出處為客賦歌頭
三十五時僥倖四十三年仕宦七十歸休頂踵皆君賜
天地德難酬詩書數冊棋兩局酒三甌此是日中受用

誰劣又誰優寒則擁爐曝背暖則尋花問柳乘興狎沙鷗知足又知止客亦許之否

百子令

八旬加二荷君天垂祐扶持老拙目送新來簷外燕手
揀好花輕折比似去年十分强健日看朱詩說篇三百
五歲前儘有披閱天教兩子供官一男留養右左相娛
悅五見孫枝三拜授童冠參差袍笏四侍鰲峰挈舟在
即次五今圓月曾孫淳老想能隨叔嬉劣

哨遍

江山風月耳目聲色取之無禁用之不竭造物之無盡
藏月白風清有客有酒踞虎登龍放舟中流聽其所止
而休焉歸去來兮昨非今是舊菊都荒新松老矣吾年
今已如此歸去來矣忘我忘世草木欣榮幽人感此吾
生行且休矣

乳燕飛

一爾炎洗似天知山溪佳處玳筵珠履六十年前今朝

慶門左桑弧蓬矢也似恁鬱葱佳氣綠鬢童顏春未老
問壽星模樣君真是新甲子從頭起應門有子能承志
總人間皺眉底事不關君耳省不日孫枝毓秀袞袞教
人滿意更又報門闌多喜飽受人生真富貴便蟠桃三
熟堪彈指知幾箇千秋歲

鷓鴣天

安分隨緣事事宜平生快活過年時長歌赤壁東坡賦
又咏歸來元亮詞開八袞望期頤人生如此古猶稀香

飄金粟如來供歲歲今朝薦酒卮

矩山存稿卷四

欽定四庫全書

矩山存稿卷五

宋 徐經孫 撰

誌銘

三友軒銘

大倫有五友居其中於以輔仁匪真朋從直諒多聞乃
益厥躬便柔則損友道斯窮或取諸物曰梅竹松亦以
歲寒匪蒲柳同吾家彌甥蔽軒于東扁以三友八窓玲
瓏人乎物乎惟益之崇損已者遠無俾憧憧取友如此

有告必忠我作銘詩式輔爾衷

九思堂銘

學造三思再斯可矣今日九思豈思殊旨蓋此有九者
之目乃主一無適之謂彼則一而三之不幾乎憧憧朋
從之累視必思明非禮勿視聽必思聰非禮勿聽色兮
必溫毋很而厲貌兮必恭毋傲而肆必忠於言必敬於
事疑而弗問蒙蔽孰啟忿而不懲或至暴戾見得而思
義乎不義物各有則合循其理是謂孔門思誠之學所

以著于善言之記若稽洪疇心思曰審作聖之功日積月累內外夾持存養之粹天君泰然各止其止不思而得自九思始我作銘詩告江夏氏楣門之扁已歷三世乃祖之訓艮齋之字陟降是堂合顧是覬敬之敬之一言以蔽

介軒銘

仲友銘其燕坐之室曰介從兄仲立衍其義而為之銘物之兩間其際曰介辨則必明昧則有晦一念之前有

公有私一事之舉有是有非其間幾何不能以寸學以精之毋淆其分鷄鳴而起同是孳孳此舜彼跖所差毫釐豫之六二見微于石三公莫易下惠迪知譬之此室介於東西一左一右跬步背馳分尺既殊當謹所發我嚴其誼托名于闥

君子亭銘

并序

翔甫姪構亭小園結架皆竹剪茅覆之既成問名於余余曰惟古以竹比君子而近世鶴山先生亦以茅為君

子之屬請以君子名之何如翔甫曰善既書其匾又為之銘並舍西北有亭卓然進脩之暇游焉息焉相彼攸宇編茅架竹易泰其茹詩斐其棗允矣君子君子居之匪尚厥德斯焉取斯

斑竹杖銘

斑竹之紋孤竹之傑滋以雨露傲以霜雪脩然相間吟風弄月取而為杖本末有截十節以前更高一節

徐夫人揭氏墓誌銘

族叔母揭氏夫人世居豐城揭源余嘗聞鄉長者言元祐中夫人之族有字伯徹者博學強記游京師不偶東走錢塘以詩百韻干太守蘇文忠公公頗奇之從容問所祖伯徹以漢安道侯揭陽定以對故今之辨族姓者祖焉曾祖諱宰祖諱先民父諱丕承鄉里世稱善人夫人性慈靜從幼不妄言笑父母重擇所適時族父榮叔力學有聲乃以歸焉既歸室為冢婦養舅姑相夫子無遺德其處女叔諸婦間始終無間言治化絲枲必力

必時凡家內之事若米鹽細故以身任之不以累其夫
若子平居服御簡約澹如也歲在乙亥榮叔以疾卒數
月夫人立子婦而詔之曰吾前此未嘗以家事混爾慮
妨爾學今不幸爾父棄我而先且汝長矣我老凡門戶
事汝兄弟宜自力若閭以內婦職也蓋至是始釋煩謝
事而子婦亦能娛侍養志有以佚夫人於老如是十餘
年以寶慶丁亥五月丁未卒年六十六子男二燠夢科
女一適同里甘元秀夢科元秀皆待補太學生孫男四

人夫人以是年十二月庚申葬于所居之後梅樹坡前
事二兄縗服謂經孫曰吾母葬有日幽堂之石已具矣
而缺其銘敢請禮辭弗獲則拜曰諾恭惟先君與榮叔
生同年幼同學長同志墳麓相好若同氣然遇時休暇
蓋無日不相聚也聚則論文賦詩酒無筭爵雜以雅歌
善譌而歸于正經孫嘗侍先君訪榮叔于時賓友狎至
笑語竟日觴豆楚楚不戒而具先君因誦東萊呂成公
之言曰求師求友婦人何與而好善之志不可不聞知

子之來之雜佩以贈之知子之好之雜佩以報之婦人如是而後其夫能好善矣榮叔亦知疇昔之所以遂此樂乎榮叔曰然經孫追紀遺言感念昔者則知夫人之行亦可書也已榮叔諱樞年姓徐氏家居富城之覺溪上喜能好脩郡嘗三遣試太學晚號拙庵云銘曰嗚呼夫人係漢揭陽來嬪于徐閭範用光夫先其歸魏彼螺岡梅坡相望而不同藏

徐公六十宣義仲盈墓銘

君諱元方姓徐氏仲盈其字也世居豐城之覺溪曾祖諱尚賓祖諱廷實父諱瑜力學有聲淳熙丁酉初立待補太學試法首與其選晚號爽軒居士仲盈其仲子也少頗不羈已而悔曰吾幼不嗜學今時過嗟何及獨不可撫壯棄穢勉吾力以大吾祖父之業乎悉索奩中裝曰是足以救吾貧于是徙有之無疾為而用舒不數年息千金則又曰吾聞擇人而任時陶朱之緒餘也乃閭族姻之可任與僕隸之有材幹者悉畀以貲或坐而賈

或行而商多寡各稱其力歲時子錢輻輳充棟滿簞或
有空所攜而不敢歸者曰是何足問仍以畀之卒以不
負晚治室屋延師儒誨子以學曰凡吾所為不得已而
舉也汝祖有遺書故冊在汝其勉之梅峰吾鄉之佳山
也仲盈廠樓面之予嘗為名曰層碧大山蕭公書其匾
曰良天佳夕聚族其上酒餘滑稽談笑造次能得人歡
心人亦每為之醉寶祐乙卯理宗九月七日以疾卒享年
七十有三娶揭氏先君五年卒子男三人克己克昌

克順克己亦先君十五年卒女一適同里甘蜚英孫男
四宗宏宗大宗允酉孫女孫一適甘應登蜚英之子也
曾孫男一曾孫女二諸孤將以丁巳十月乙酉葬于所
居之前坊鄧家園前事以書來乞銘余猶記甲寅春鄉
里艱糴人持錢竟日無所遇仲盈首發廩為倡計口而
糴之人以無餒又記己卯秋不雨仲盈請禱卒獲嘉應
歲以有秋此二事皆有志于善而鄉人德之者是可書
也已予視仲盈為族子年長於予居相比且相好也銘

何可辭銘曰勤儉以裕其家詩書以訓其子是惟仲盈之墓衍慶源其無已

十四府君山居徐公墓銘

淳祐丙午夏余令臨武收仲弟家問諗余以族姪士貴物故余盡然流涕既以書致奠且弔其孤越二年余貳郡長沙其孤繼鉉又介仲弟來請銘其父之墓余念昔叔父通直公嘗銘士貴之父矣今何敢以王事不間為辭乃敘而銘諸士貴諱希周姓徐氏士貴其字也初名

景周因讀西山真先生希元字說謂景非經旨易名希
周曾祖諱浩祖諱檜考諱灼妣甘氏生而終鮮父母鍾
愛欲其一意于學不使聞外事自成童志學則延師家
塾明窓短檠晨夜程書足跡不妄踰閩既知方則詣名
師重費不憚故東江帥幹林公彥揆以學問文章槃瓊
後進衿袂雲集士貴每為林公許可嘉定壬午秋試以
詞賦屈充太常博士弟子員君笑曰志于目而中于眉
我則無勇然賢關亦吾願遊鼓篋未行而丁父憂惻然

終喪隻力膺門無復四方之志所居富水之北涯環山
面勢茂林脩竹翛然處士之廬匾曰山居今廬陵太守
宗丞李公義山為書其匾士貴為人重義輕利自己事
常若戚嗟畏縮不敢有所為他人有急慷慨喜自任奮
不顧危難人以是多之丙午正旦忽得異夢語家人曰
吾其不逮七七之數乎果以是歲四月戊子以疾終于
寢生于慶元己未享年四十有八娶同里甘氏子男二
人長曰仙感早夭次曰繼鉉習進士業女三人長適臨

川進士王應津次適甘士元次許適黃季璘皆同邑進士繼鉉將以戊申十月甲申奉柩葬於富城喜源之阡距家纔數百武於是繫之銘曰富水之北喜源之陽有山如畫杉松鬱蒼是為士貴之藏後嗣其吉昌

內省居士墓誌銘

族伯父內省居士徐公諱桂字億年居豫章豐城之覺溪其先則撫之宜黃人也曾祖諱端仁祖諱邦義父諱浩皆蓄德不耀公天性孝友事親左右無違委順伯氏

人無間言考君既老而傳分橐歲入饑饉而公能苦攻
食淡纖嗇自力仰有取俯有拾晚歲家益豐咸謂公可
少紆矣而敝冠裋褐自奉泊如未始易其度獨于勝緣
善事則樂為之脩孔道成徒枉捐金佛老之宮範鐘塑
像金碧丹漆雖重費不憚尤喜蓄奇方良藥遇疾痛艱
棘者和方七飲之隨失其疾來謝則却勿受曰人患之
謂何又因以為利豈吾心也嘗汎掃一室藏焉息焉扁
曰內省族姻過從則觴于是余叔父金陵法曹為之記

故識與不識皆號曰內省居士平居訓飭子孫惟儉惟勤乃克負荷有布衣一襲得之王父儲藏五十餘年風炙惟時以久不敝一日語孫執善曰我于吾祖為仲孫實受此賜今汝吾仲孫也我死則汝保之公之心蓋可見矣春秋八十四以疾終于寢實紹定庚寅三月九日也娶同里甘氏婉德勤家先公二十年卒葬富城鄉之之登科里子男四人燧煒勤生志學女三人適黃佑揭惟脩甘贊孫男四人應善兩充太學生執善友善明善

女一人適甘壽南曾孫男三人宜孫龍孫符女一人尚
幼其孤將以是年十二月庚申葬于甘氏之兆前事命
經孫曰吾父葬有日敢請銘經孫三辭不獲命則退而
以所聞見誌之恭惟公之壽八十三戶曹甘君同叔誌
其墓所謂醉鄉有備五福之君子也考君壽九十四特
書直道而行畧無拘束之語以沒先君嘗跋其後亦以
為庶幾仁者之壽余嘗謂富貴或可以智力取壽祉不
可以幸而得然可以智力取者或能有諸其身而不能

保諸其子或能保諸其子而不能必諸其孫甚者一日
之間始裕終嗇孰謂耆年備福不可幸得而祖父子孫
之可相望乎今公三世踰八望九至垂百齡又皆康強
考終子孫逢吉豈非積善成德世濟其美而天道既定
常與善人故耶乃繫之銘曰有祉有年如祖如父匪天
之私惟德之裕我最其德伐石以詩式告後人勿替引
之

徐孺人黃氏墓誌銘

孺人黃氏世為豫章豐城人曾祖諱巷祖諱仙父諱昌
隱德勿耀孺人在父母家孝謹專靜從祖柳州錄事參
軍文林公奇之曰是女必貴且壽勿以與凡子年十七
歸我族父徐居士上侍重堂禮無違者時居士家尚微
孺人相以儉勤姑叔多幼孺人視猶弟妹迨畢婚嫁貲
助為多閤閭五房性靜躁不一食指且千孺人盡已而
恕人門內肅雍帥之為順至相語曰我學長姒諸子少
長居士遣從師資或延至家塾孺人仰承盡禮居士既

捐館孺人誨子若孫尤篤介然自守持門戶益嚴經理有方家益裕然自奉簡約則履其素歲在辛未天子慶東朝壽馳恩區內凡父母年高者賜有差孺人年應詔書縣府以聞始受封子變新堂落成迎養有偉經孫為取命書其錫華偕以開壽域之辭匾曰華壽湖南常平使者姚公大書之拜命之日子婦孫曾羅拜上千歲壽孺人飲而醺且曰吾逮事曾舅姑今抱曾孫俯仰六世老身康健且拜天子錫命何以報造物惟一念乎善尚

庶幾焉汝曹共勉之淳祐癸卯三月甲申以疾卒孺人莊重寡言笑至有所教戒言從理到聞者心服待族姻以厚凡貧無歸或不能自衣食者隨力賙之歲凶少食不自足而飽饑者御臧獲以恩不責所短晚歲尤樂善事老佛之宮有謁必施日課西方書若有所自得者居士諱椿年季父通直公嘗銘其墓曰資之奇學之時材與命違人人以為至論子男四人曰焞曰炎皆先卒曰燾曰熹好學能家孫男九人方競于學女二人適同里

進士孫禮仲范金曾孫男二人女孫三人長適同里黃
瑀餘尚幼其孤將以卒之明年十月癸酉奉孺人柩葬
于所居富城鄉羅坑之源羊角峰之下前事變熹縗服
過經孫哭且拜曰先親葬有日敢乞銘經孫自念幼辱
知憐長蒙授館且母與孺人生相好誼不敢辭謹序而
銘之銘曰婉婉令儀允婦允母始於儉勤終貴且壽鸞
誥煌煌天子之錫人曰以年天其以德羊角之峰鬱天
其蒼山環水環子孫其昌

仲表上舍墓誌銘

君諱緯孫仲表其字也姓徐氏世居隆興豐城之覺溪
曾大父諱長孺號桂巖逸人大父諱濬累贈承仕郎直院
侍郎李公劉銘其墓曰覺溪先生考諱茂異累贈奉直大
夫妣吳氏累贈令人仲表生嶷然甫就外傳與群兒殊年十
二隨先大夫客授能以身律同學者未冠習舉子業下
筆數百言既冠與予偕假館以養名節歸省各以所得
相琢磨歲在乙卯元叔通直公充賓貢仲表待補太學

明年通直公擢第春官仲表試成均不利歸而益治其學自是學益工從遊者亦衆凡經口講指授者隨資稟有就升于學薦于鄉登于仕版者皆有之寶祐癸丑予綴朝班仲表補國學生私試賦用盈缶納約自牖原韻云處富貴之地者入儉最難因開明之天者進言孔易司成孫公願質喜其氣老語勁既謁謝孫公曰吾得人矣尋謁告歸今年天子加恩三學皆得試別顧仲表初不欲就予強之試不偶別予曰功名有分弟歸不復來

有子可教抵家書遺予曰屋西架小閣日宴坐其上友
蒼山延白雲課子讀書有足樂者余心嘉之悵然作風
雨對床之想書還未達而仲表以疾終矣嗚呼痛哉仲
表學識有源委作文有氣骨臨事辨義利與人交有信
生平不妄登人門惟受知于清敏范公應鈴最深清敏
登朝持節江湖南皆與俱景定庚申邊馬透渡哨至
隆興大岸已而臨瑞故鄉人大恐皆欲逃生山谷間仲
表曰吾徒不幸而遇敵難仕者死官守居者死墳墓義

也且望風先動敵未必至而鄉皆懼矣卒不動衆恃以安其臨難有見如此故其沒之日識與不識無不傷悼初娶同邑胡氏再娶崇仁胡氏三娶同邑歐陽氏子男三人思謙早夭思誨思諝女二人長適同里范藻今任南安軍南康縣令登之子也次尚幼仲表生慶元丁巳閏六月丙子卒于景定壬戌八月乙酉得年六十六以是年十月丙辰葬余坡去家纔百弓地從治命也嗚呼自先大夫捐館弟兄相依為命扶持門戶不幸仲敬早

世今仲表又棄我逝矣惟予與季弟相望于千里之間
諸孤斬然幼者未齒益重鵠原之痛嘗三疏乞歸願未
之遂思謚以葬日來告謹識其悲而銘之曰有學以為
本有文以為華涉僻流而弗濟吁其命耶

仲正學舍墓誌

君諱綱孫字仲正姓徐氏上世撫之宜黃徙隆興豐城
之覺溪蓋三百餘年矣詩書之澤日演以盛曾祖諱長
孺號桂岩逸人祖諱濬特贈承仕郎父茂異累贈大夫

妣吳氏累贈令人仲正天性孝友九歲喪大夫公執禮如成人從諸兄讀書學文知自刻苦辛卯秋試充待補太學生是冬從予侍宜人之官長沙益勵于學越二年白宜人曰伯氏有祿養親仲叔又皆官授先廬誰與守綱孫請歸宜人許之既歸且學且耕力貧自拔積勤儉三十年田有租山有木撤故廬而新之堂有序一閣翬飛族姻朋友往來臨風對月盃酒相屬歡如也余兩登朝有西湖之約不及踐癸亥冬予以煩言去國仲正迓

至臨川以予得歸喜見顏色蓋自是無日不相聚也今年三月以疾歸自邑余日夕往問必冠而後見越五月卒嗚呼余弟而止是耶娶何氏子男一人思誨女一人皆幼仲正處已謙與人周故卒之日哭者必哀靈生於丁卯四月癸巳卒于乙丑三月辛巳得年五十有九以是年十二月壬申葬於所居富城鄉含山之源予惟兄弟四人同受先世簡書之托今諸弟既沒予獨後死昔嘗誌二弟今又忍誌季弟耶泚筆淚落不知所云是年

寶咸淳元年

貢士徐君北壑墓銘

君諱泳孫字仲時元名子中姓徐氏世居隆興豐城之
覺溪曾祖諱長孺號桂岩逸人祖諱濬承仕郎學者以
覺溪先生稱之父諱韡登嘉定庚申進士第歷吉州安
福縣主簿建康司法柳州司理以通直郎致其仕仲時
生而警敏年十二三通直公攜之客授于外嘗語之曰
我以貧故受人子弟之托力暇及汝汝宜自力每授業

知時拱侍左右他生有未習仲時轉以曉之暨隨宦四方多識名人先達所得前言往行尤多如金陵陪都之形勝湘南海外之風物時時為人誦之聽者如親見而身歷之也通直公卒仲時扶護以歸既終喪又改葬母饒氏夫人禮無違錯為文有氣骨以理致為主試庠序輒出流輩右歲在戊午偕計上春官今上登極又以潛藩恩試禮部俱不偶益自奮勵孰謂天不假年竟齎志以歿耶仲時生于嘉定戊辰五月甲子卒于咸淳庚午

四月三日享年六十有三娶臨川方氏居士諱叔淵之
女子男三人思諒思諒皆向學思諒尚幼女三人長適
承信郎趙大球先仲時弟三年卒次未許嫁而天次適
同邑進士范坤載仲時事親孝處族姻以和待朋友以
信尤篤于教子知己過從觴詠連日人或以急難告不
以存亡有無為辭故卒之日弔者甚哀聞者悼痛思諒
將以是年閏十月己酉奉母命葬于所居水北山之陽
去家纔數武嗚呼覺溪先生五孫先通議四子通直一

子余最長仲時最幼仲表仲敬先後淪謝余癸亥來歸
惟仲正仲時相聚仲正不幸以乙丑歲沒好天良夕杯
酒從容惟余與仲時爾今又棄我而逝余讀昌黎集見
其銘崔叔清曰朝之言嘻嘻夕之言怡怡不見而死吁
其可悲嗚呼昌黎於同官尚爾況余兄弟之至情乎銘
曰氣吞餘子兮智可一官清秋一鷄兮飛不盡翰天既
生之兮曷成之艱年未中壽兮返其家山義木之亭兮
瀛洲之灣精爽如在今往來其間山明水秀兮面勢平

寬後人之利兮宅兆之安我銘諸幽兮百世不刊

矩山存稿卷五

欽定四庫全書

矩山存稿附錄

詔誥

留引年詔

勅尚書省所奏乞引年致仕具悉唐孔戣為尚書年七十
三上書去官韓愈止之曰公尚壯奚去之果至奏疏流行
到今以為美談卿年尚少于戣是一不宜去漢儒貢生以
子少欲退初元有詔止之曰以王命護生家雖百子何以

加卿自言有子肯堂又過貢氏多矣是二不宜去矣以直清典朕禮以華皓從吾兒方於卿有賴所請宜不允

留致仕詔

國家體臣務合九經尊賢之典大夫有德奚拘七十致仕之文以卿厚重有常碩大且儼由翰林而進今之職既特拜于延康任耆社而當壽之年宜養恬于崇福雖齒之宿而力未憊若為抗章遽欲投綬故國有喬木每為舊德之高華髮為元龜尚冀遠猷之告引年之請非

朕樂聞所請不允

皇太子送出朝劄

輔青宮之教久藉儲端綴文右之班莫挽內相有懷警
誨無計挽留顧行色之匆匆重此情之戀戀將寸忱於
實篚少效勤惓渺千里之歸舟特加珍護敬有塵溷伏
冀炳融

贈金紫誥

佚老丘園久遂掛冠之志輸忠猷畝忍聞易簣之言嘗

首橐班可稽祿典資政殿學士正奉大夫豐城開國伯
食邑九百戶致仕徐經孫端方有守孤潔無朋出領屏
藩備殫牧禦入司獻納畢吐忠嘉乃辭金馬於直廬自
適白駒於空谷朕載嘉雅尚遐想高風前代金章之官
所以華耆德我朝資政之職亦以寵舊臣惜不畀於生
前徒加榮於身後庸頒特命姑寄深悲噫一鑑云亡孰
効進規之益九京可作尚欽追錫之榮可特贈資政殿
大學士金紫光祿大夫餘如故

宋翰林學士贈金紫光祿大夫謚文惠徐公墓

表

嗚呼官至於金紫壽至於大耋其生榮矣雖晚福考終
不及悲于風景而幽堂改奠迺屢閱于星霜君子羨學
士徐公之令終亦重悲其閱世之不克以禮葬也坏土
荒涼與凡民等墓前不容一圓石書其姓名謹按豫章
徐氏皆出高士而覺溪之徐名在進士科舊矣公諱經
孫字仲立初名子柔應舉始改今名登寶慶丙戌王會

龍榜進士出身歷官潭州瀏陽主簿柳州永興令知桂陽軍臨武縣事通判潭州國子博士監察御史福建提刑安撫知福州貳秘書宗正起居左右史兼給事中刑部侍郎禮部尚書翰林學士知制誥度宗在東宮公初為資善堂直講又歷諭德庶子詹事爵至豐城伯官至正奉大夫遺表贈金紫光祿大夫以紹熙壬子九月辛亥生咸淳癸酉閏六月乙亥薨逝曾大父長孺大父濬以公贈承仕郎妣范氏繼唐氏俱贈孺人考茂異以公

贈至通奉大夫妣吳氏贈淑人娶饒氏贈淑人子男三人思訖知饒州鄱陽縣事思訓知贛州府贛縣事思訓前杭州檢點所提幹桑海一變蘭玉連摧孫男四僅存者三敏學承務郎務學通事郎心學公薨後乃生曾孫男四璿亦早逝璋瑜生晚皆不及見里居洪撫之境有山方正因號矩山公之在臺察給舍彈劾繳駁屢犯戚里近侍景定間賈似道初相莫敢議執政善否公抗論買公田不便未幾除翰林學士知制誥是官舊不常設

旋以御史舒有開奏免所居官遂歸不復仕度宗以宮僚欲留莫得尋奏畀祠祿逮其即位以引年致仕屢除不拜榮以書殿加以封邑及聞遺表備極恩贈閑居十年皆似道秉政之日辭世三年始有魯港之敗舉目山河之異公不及見矣惟公貴而能貧不治產業身後蕭然思詵等嘗奉柩葬于所居之水北俄以地理家異辭舉遷世換人亡孤弱不克葬歷四十有三年為延祐丙辰三月二十六日諸孫始復奉柩祔于始祖何夫人墓

左其葬也多心學之力敏學走郡請于朋來願書墓石
惟公即世已久當時及門之客莫有存者余弱冠以里
中子嘗托門塾故不敢辭而表其墓曰斯墓也是昔翰
林學士也是在烏臺而不畏權貴者是在鸞臺而不畏
近侍者是景定罷朝而不附公田之議者是咸淳遯野
致為臣而不仕者避世十年辭世三年而山河異矣葬
之緩急正不暇為身計也吾書在石勿礪勿燧倘見采
於太史也里生前進士熊朋來撰

史志

宋史本傳

徐經孫字仲立初名子柔寶慶二年進士授瀏陽主簿
潭守俾部牙契錢至州有告者曰朝廷方下令須行十
七界會令若此錢皆用會小須則幸而獲大利矣經孫
曰此錢取諸保司出諸公庫吾納會而私取其錢外欺
其民內欺其心奚可哉詰旦悉以所部錢上之其人驚
服有愧色辟永興令知臨武縣通判潭州帥陳韓雅相

知事必咨而後行秩滿由豐儲倉提官進權轄國子博士兼資善堂直講為監察御史劾京尹厲文翁言偽而辨疏入留中宣諭至再即日出關上遣使追之不及進直寶章閣福建提點刑獄號稱平允歲餘陞安撫使召為秘書監兼太子諭德經孫為安撫時韓家居門人故吏有撓法者不得逞相與搖撼至是韓起家判本郡懷私逞忿無復交承之禮即日劾奏通判語侵經孫謂席卷府庫而去于是罷通判削其秩經孫造朝具白于政

府事上聞帝大怒諭宰執曰陳韓老繆至此宜亟罷之
于是經孫再詣政府言某韓門生也前日之白公事也
苟韓以是得罪人謂我何請之不置俾自乞閒明通判
無罪識者趨之遷宗正少卿起居舍人起居郎入奏君
人者當守理欲之界限遷刑部侍郎兼給事中陞太子
左庶子太子詹事輔導東宮者三年敷陳經義隨事啓
迪太子入侍必以其所講聞悉奏之帝未嘗不稱善景
定三年春雷詔求直言經孫對曰三數年來言論者以

靖共為主有懷者以譁訐為戒忠讜之氣鬱不得行上帝降監假雷以鳴切中時病公田法行經孫條其利害忤丞相賈似道拜翰林學士知制誥未踰月諷御史舒有開奏免罷歸授湖南安撫使知潭州不拜授端明殿大學士閒居十年卒贈金紫光祿大夫經孫所薦陳茂瀛為公田官分司嘉興聞經孫去國曰我不可以負徐公遂以親老謝歸終身不起

江西通志列傳

徐經孫字仲立擢寶慶二年進士授瀏陽主簿辟永興
令進直寶章閣福建提點刑獄遷安撫使尋召為秘書
監兼太子諭德宗正少卿起居郎入奏君人者當守理
欲之界限陞太子左庶子太子詹事輔導東宮三年太
子入侍悉以其所講聞奏帝未嘗不稱善會春雷詔求
直言入對曰數年忠謹之氣鬱不得行上帝降監假雷
以鳴言皆剴切深中時弊後加端明殿大學士閒居十
年卒江西參政林庭棡副使周廣纂脩

豐城縣志列傳

徐經孫字仲立覺溪里人濬之子號矩山登寶慶進士授瀏陽主簿潭守俾部牙契錢至州有告者曰朝廷方下令須行十七界會令若此錢皆用會小須則幸而獲大利矣經孫曰此錢取諸保司出諸公庫吾納會而私取其錢外欺其民內欺其心奚可哉詰旦悉以所部錢上之為御史劾京尹厲文翁言偽而辨疏留中宣諭至再即日出關上遣使追之不及召為秘書監太子諭德

遷給舍論謝堂不宜以後族次對西清繳董宋臣不宜以近倖與兵柄陞太子詹事數陳經義隨事啓迪景定二年春雷詔求直言經孫對曰三數年來言論者以靖共為主有懷者以譁訐為戒忠謹之氣鬱不得行上帝降監假雷以鳴切中時病時賈似道議買公田以省糶運經孫亟論非便忤似道除翰林學士知制誥未踰月諷御史舒有開奏免授端明殿大學士閒居十年卒贈金紫光祿大夫爵豐城伯謚文惠經孫既貴不治產業

身歿蕭然塋不利舉遷至再歷四十三年為延祐丙辰
乃克葬

閩大記名宦傳

徐經孫豐城人寶慶間官福建提點刑獄號稱明允歲
餘轉安撫使知福州經孫先宰臨武為潭州帥閩人陳
韓所知既任閩適韓家居經孫秉公守正韓親屬有撓
法者不得逞相與搖撼經孫韓深怒之韓尋起家帥本
郡懷私忿劾奏通判語侵經孫朝命斥通判經孫造朝

具白政府明通判無罪事聞帝欲罷韓經孫于是再詣政府言某韓門生也前日之白公事也苟韓以是得罪人謂我何力請不置遂自乞閒識者韙之侯官野史王應山纂輯男王毓德編次

給事徐侍郎先集序

某庚申仲冬朔侍立直前奏事越三日蒙恩擢貳夏卿仍兼西掖時矩山徐公兼東省同論思同封駁每見公于朝廷文字溫潤精切常自媿其言之繁蕪其于官府

命令士大夫除授必是是非非義形于色某素懦雖欲
自毀袖中之稿附名淳夫之末而不敢近傍也兩省同
寅者幾二載一日公出二徐先生遺文一帙曰覺溪公
王父也曰觀過堂公嚴考也覺溪之作如蟠桃實優鉢
曇花希世一見見則為瑞觀過公大篇如廣樂萬舞短
章如廟瑟三嘆鶴鳴章指金華殿中語也豈特足以補
呂氏讀詩記哉二老有文如此而終身隱約不遇詩書
之澤鍾于矩山公之身宜哉昔坡頽為文章大宗師而

歐陽公尤稱老蘇秀才之言曾南豐亦作明允哀詞山谷為詩初祖而句律自山鬼水怪著薜荔天祿辟邪眠莓苔之語而出某於矩山公三世亦云禮部尚書莆田劉克莊

贈詩

監丞樓穎

祗道襟懷止水平那知袖裏有雷霆
奸儔破膽潛幽穴善類揚眉集廣廷
勇退何須三出畫不留可驗少微星

幾年劍氣沖牛斗端的先生炳地靈

見說君王重講書傳宣三日到桐廬諸賢近歲多遷就
公義今朝却展舒霄漢星辰今失伴溪山風月好留渠
子房高卧周昌慙商皓應難學二疏

李林後

局勢孤舟駕怒濤急流誰肯暫停篙那知鷗擊秋霜勁
不放鷗音晝夜號鐵面拔山輕若厲丹心戀闕銳如毛
見機而作真君子官爵雖卑氣節高

太學徐紘

世事糊塗寧退藏
鬼車眼底幾金章
空舟清載桐江月
直節高凌柏府霜
不為諸郎官職計
只留千載姓名香
煩誰說與歐余蔡
要共椒蘭一樣芳

東甌林堯之

夜忤中能叱鶴羣
竹輿拂曉出脩門
去程五里復五里
世道一番差一番
國去老醫人共駭
史留野筆古難言
此歸向後多風雪
不是春晴莫出村

蜀劉仲房

白簡朝陳暮掉頭飄然一葉理歸舟
嚴霜載路風逾勁
杲日當空霧欲收
嗅藥梅邊還我去
尋芳花底為渠留
劍江千古英靈物
紫霧仍前射斗牛

邵陽李茂良

六宮脂粉角春嬌
巧畫蛾眉俟燕朝
一見傾城傾國色
低頭不敢說妖嬈

姪國博思立山房

寶祐癸丑秋叔父我舅冠赭袍重親擢率傳爭相煩諫
舌劇帝闕英風凜朝端疾惡懷剛腸憂愛由忠肝伊耆
本能括集處猶交驩醜正恣腹誹罔上多面謾豺狼正
當道獬豸宜觸奸世俗固喜圓忍使方為刳誰為中流
柱以身障狂瀾誰為獨擊鵲霜簡先抨彈手排一不肖
汗流三諫官驅厲亦何勇拔山古為難夜漏卮抗筆遲
明理征鞍行行復行行竟至羊裘灘公非悻悻者純然
炯衷丹聲諫既莫容身諫那敢安天王果聖神感悟中

赤殫御筆謹勉諭宣使來江干六千難力挽百壬空膽
寒脩明日月皎歸袖天地寬公出亦榮矣夾道紛圍觀
賢哉是丈夫直節看不刊其間知己者歎嗟為長歎開
元與天寶進退惟一韓汲直不補外漢鼎方石磐願公
聞此語憂國強加餐暫撫松和竹三徑猶未殘黃花香
晚節功名悠久看

特奏狀元樂雷發

浙江潮浙江潮聽我撫劍歌長謠何物厲鬼逞妖媚歟

鱗掀舞狐狸嗥奄奄泉下蜍志輩波流風廟何滔滔亦有忿世嫉邪者往往欲進欲退項背生寒毛天生聖明眉八彩渾敦禱杙與餐饕惡貫自待滿疎網終難逃彼哉木魅肆巧辨蠛蠓衆正欺蒼高西顥橫殺氣南岳才涼飈差我神多出靈嶠突兀蒼隼凌崇霄臣有剗蟆鐵臣官柏府曹臣請誅正郊之偽辨臣請斥國中之昏妖排奸擊佞臣職所當盡鈞名賣直臣心無所要夜飛白簡徹御榻曉披青篴掉歸舸鳬鴨折翅竟驚逝鸞鳳遐

騫邈難招偉哉骨鯁臣壯哉清明朝是為南州徐高士
衡廬翼軫盤結成此豪外有光霽灑落之氣象中有巉
岩斬絕之風標正如豐城寶劍勁氣射斗牛又如旌陽
鐵柱神力鎮逆蛟想當草奏時百靈護揮毫豐隆執法
拱手供服役崖公富媪降監何昭昭功名自將留久遠
只今埃壘輕蟬貂顧予共忠憤曾對選舉條斥狼奸恨
不力覩面汙藍袍陽城陸贄久不作見此偉節頓使鄙
吝消古今富貴磨滅安可數惟有清明萬世常岩巖狂


金史四庫全書
附錄
歌豈但張盛美要將硬豎脊梁攀華鑣浙江潮浙江潮
我詩激烈應須聽君其問諸釣臺之石晉江之濤

萬平埜

西風昨夜忽然狂萬葉飛紅天下霜晚節可觀霜後菊
一番霜過一番香熙豐平地起風波砥柱中流有老坡
舒亶一箋坡老去後學國事竟如何朝雲黯黯日陰陰
泰宇無塵有此心一笑出關天地潤人生至樂在山林

福州士人

公今持繡斧一似未官時無地通關節憑天判是非吏
閒衙退早事省印開遲八郡闌干月分輝照客衣



矩山存稿附錄